

(海陸腔)

【都市大樹下个原生态】彭瑞珠原作

在厝屋下附近，有一間當大、當大間个大賣場。佢兜个停車場脢，還留等原旦種在舊工廠脢个老樹仔，樹下乜還留等一大遍个空地，分植物做得用原生态个方式自由大。佢試著，這空地有摺這間外國連鎖店加分，因為，佢有分人一種尊重臺灣植物、珍惜臺灣在地生態个感覺。

成時，佢會在樹下臥頭看，看該兜鳥仔，在高天天个樹頂，高高飛、高高奈；成時，佢會坐在停車場脢个紅毛泥矮牆，看該兜囊蜆仔、金姑仔，在高天天个大樹下，定定仔飛、慢慢仔奈。

該兜，翼還㗎燥个蝶仔，乜毋使驚會分晡等佢兜、隨時都有可能擲¹過來食忒佢兜个鳥仔！因為，四圍都係人屋、車仔、大路，大路該片還有火車不時下南上北，在該確落確落²！所以，鳥仔佢兜乜想愛飛高高、較自在，係無，若係橫打直過撞著人，抑係分車仔撞著，該就衰咧！所以，這樹頂、樹下，有無共樣个生活速度、無共樣个生活方式。

你看，該兜錢七³，在樹下放勢牯遛，遛到滿哪仔、遛到一

圍牆！大賣場裡肚乜有賣錢七，幾皮仔就愛賣幾下十個銀。該，這位滿哪仔都係，仰無人摘呢？第一、該，又毋係偲俚个東西！第二、你毋驚，有細狗仔正滌啊過尿哦？哪有人，恁無衛生！

熱天个大樹下，該兜葉仔像分床公婆做過記號樣个冷飯藤⁴，還會開出一翕⁵翕个細白花，當得人惜！白花無恁白咧，就會間等有烏烏个細果子，安到「烏蠅屎」；這，摺偲俚兜發在面町个烏蠅屎無共樣，係食得得个烏蠅屎。你問佢，會去摺人偷摘來食無？該，佢無恁惹哪！就摺你講過，係有細狗仔正滌啊過尿，該毋就 ……………，仰會恁惹呢！

冷飯藤開花咧，做得轉去姐公个山園啊，該位，乜有野生个烏蠅屎，無人洩農藥、乜毋會有狗去蹠⁶。係無，偲俚乜做得自家種啊，用花鉢，種出偲俚自家个「原生态」來，你講係無呢？

¹ 擲：音 s i o ㄨˊ；快速擊中或撞擊。

² 確落確落：音 kog ㄨˊ log ㄨˊ kog ㄨˊ log ㄨˊ；此指火車行進的聲音。

³ 錢七：音 cien cid；洋落葵，又稱川七、藤三七、土三七等。

⁴ 冷飯藤：音 lang ㄨˊ pon+ ten；火炭母草，又稱白飯草、白飯藤、烏飯菜等。

⁵ 翕：音 po ㄨˊ；量詞，串。

⁶ 蹠：音 li en ㄨˊ；反覆踩踏。